

IL TESAURO DI RICO

Rico al ere un omenut che al viveve dibesôl intune cjasute poade a mieze cueste de cueline, inbande a un riulut che a corevin agutis rampidis e ligriosis, che, vegnint iù sclipignant sui claps e inmaniavin rumôrs sunsurôs e distensîfs. Rumôrs che Rico cul so lavôr di ogni dì, ce cul netă lis cabis dai cunins, ce cul uză il falcet, ce cul remenă i seglots dal lat, iu mesedave in mût che al rindeva tal aiarin lizerin e parfumât, un musicâl di quiete armonie e di un gjentîl vivi. Al ere restât cence la femine, biăt omp, bielzà di un piezon di agns, quant che i doi fruts, Giosuè e Merico, e ierin lâts a vore tes Giermaniis intune fornă a pescjă rigile par fă modons.

Dut căs Rico però, nol si ere pierdût metinsi a fă une vite di bandonade besolance, ma, al contrari, sgrimie di omp come che al ere, al puartave indenat lis oris de zornade daûr lis vôrîs des stagjons, cence padin e cence pierdi timp in pinsîrs straneôs, o cjalant par aiar come i cocăi.

Cusì ben, ogni volte che i vanzave un pôc di timp pal quâl il zîl a nol sedi stât nulât di ploe o che lis svintadis a no sedin stadis mase malandrinis, lui al partive intabarusât cu la sô vieste di lavôr al viers de braide, laiù dapît la cueline, alî che la Urane e murmugnavo cu lis sôs aghis vivavarôsis e libertinis, madracant sot i crets fra i rivâi sverdeâts e i boscs pindulâts di lianis e grindulîs.

Il pas spedît e cu lis mans in sburte poadis su lis mantis de cariole cjamade cun tun seglot plen di ledan di cunins, di vanzuns di cusine, compagnât dal ciulâ de ruedule e in lontananze viers dal Cjampeon dal cjant dal cucù, al rivave cu la sô grinte e di buine voe in te sô braide sore dal rivâl inbande dal ronc a soreli ievât.

Laiù intôr de scuse ruspiose dal grant cesâr, i parusins e becotavin sveltins e indafarâts lis besteutis che dome lôr e podevin viodilis; cusì ienfri une svoletade e che altre, poâts su lis bachetis sbancjadis di une immensitât di macs di rosutis e mandavin ta l'aiarin sancîr di bonodôr, i lôr cjant ghlinghinant e zughetôs, che al someave ch'al disès "cence bêz cence bêz". In bande dal sflandorôs orâr cu lis sôs fueutis lusints e i lis pomulis come boculis neris lì che a pasavin la gnotade i ucelùz, al ere metût il ledanâr, ben sestât e furnît di ogni sorte di vanzuns che il musulin al faseve biele figure e al deve tal voli a chel che al pasave tal troi.

Ducj e si domandavin cemût che Rico al faseve par produci cusì tant ledan dapît di un an; ma par tant che al si nicave, ce cu la vacje ce cui cunins, ce cul purcit, ce cu lis gjalinis, ce cui vanzuns de cusine al rivave a fă chel bondant musulin, che lu finive di taponâ cu la cinise che la produseve tal spolert de cusine.

Ogni an quant che il ledan dapît da l'unvier al diventave fat e nol fumave plui, lu puartave metintlu a picui grumuts te braide, cusì daspò velu sparnicât a lu voltave daurman sot il plet; magjnâsi vuatris ce biele robe che i vignive su simpri cence vê bisogne di stâ tant a sofletale.

Ma i carampans dai ains e levin su ancje par Rico e daspò vê fruiade la vite a farce di lavorâ, ancje che sgrimie di Rico al ere rivât insomp consumât di par di cul ingrumasi dai ains.

Inalore e forin visâts i fîs des condizions di salût dal pari che a tornarin dongje de Gjermanie e rivâts che forin a cjase Gjosuè e Merico si sentarin dongje dal pari cirint di tegnî su il morâl.

Lôr e cirivin di cjacarai di tantis robis in mût di podê lasâ de bande chel brut pinsîr dal mâl che i procurave la perdite des fuarcis.

Venasti che Rico invecit al capive bielzà dibesôl dut e cheste volte al sintive a vignî mancûl di fuarcis, al stes mût di une cjandele intal moment che e à consumade la ciere.

Alore dal iet al slungjà la man al viers di Giosuè e di Merico fasinti a lôr lis consegnis di ce che lui al ere rivât a fâ e tal ultin ur disè: cjalait fruts, us lasi un tesaur che lu cjatarês laiù in te braide; daspò dite chest Rico al si studà cence nisun dolôr e cul non di Diu.

E pasarin lis zornadis daspò il funerâl di Rico, e Giosuè e Merico daspò vê iustadis lis robis, e si domandarin di lâ a cirî il tesaur, sigûrs di ce che ur veve dite Rico prime di murî e cusì a si meterin di buine voe a scavâ in te braide indulà che al pasave il so timp di lavôr.

Scave cul, scave là, scave in bande, scave par lunc e scave par larc, oromai dute la braide e iere stade

voltade sot sore, ma dal tesaur al no si cjatà un boro di nuie.

I doi e si cjararin in muse, daspò vê faturât par zornadis tantis di vê fats vignî i cai tes mans scuintiâts e stracs, i doi cence pierdisi di animo, e si diserin: "comò che la braide e iè dute stade voltade sot sôre e che a iè cusì ben cuinzade di vecje date, o puedaresin metili a semenâle cun dutis Lis verduris, cusì al mancûl nô no varesin lavorât dut dibant".

E si meterin di buine lene a semenâ, la semence e naseve ben e a si viodevin vegnî su lis verduris di par di cun tante bondance e reuscide che ogni di e scugnivi lâ su in place cul cjaruz cjamât a vendi lis verduris e dute la int in code a spietâ di comprale.

Ogni zornade e ientravin boins bêz e dapît de anade e si cjararin a vê vuadagnât cetant di plui che no a sei a vore ducj e doi te fornâs de Gjermanie a pesciâ rigile.

A chest pont e si visarin des peraulis di Rico e a capirin che te braide indulà che sot e coreve la Urane inmadracansi ienfri ai crêts e la boscae cu la grindiuile picjade, sore il rivâl in chê buine tiere coltade al iere il tesaur di Rico lasât pal lôr vivi.

Chê tiere cuincade cun dutis lis robis de cusine, des bestis e la cinise dal spolert e iere diventade un tesaur che al servive par vivi in salût.

Al è stât simpri cusì, la mari tiere, ancje se o vesin di lasâle de bande par vê crodût di vê cjatât di miôr iê nus riserve simpri la sô fertilitât pal nestri vivi.

Luigi Candolini